

**COLUMNA**

# «Spetga uss, pli tard lura!»

SILVANA DERUNGS

Ans imaginain ina giada ina famiglia, ina scoliras, ina cun geniturs ed uffants: fragliuns e mezsfragliuns, in pèr uffants adoptivs, e savens èn er en chasa amis da la brajada. Ils numns dals uffants èn Terrur e Terratrembel, Guerra, Erupziun Vulcanica, Malaura e Midada Climatica, Accidents, Pandemia-Epidemia ed anc auters. Igl è grev dad avair la survista. Er ils geniturs, Pievel e Politica, n'èn betg adina perina, tge uffants ch'èn propi ils lur e tgenins betg.

Item, els èn qua. Ed ils geniturs han gugent lur uffants – sa chapescha tuts tuttina. Ed els sa dattan fadia da dar a tuts la medema atenziun ed affecziun, ubain: da dar a mintga uffant quai ch'el dovra tenor ses basegns individuals. La figlia Midada Climatica p.ex. na dovra betg tanta atenziun. Ella na sa lamenta betg bler, è plitost calma e retratga ... magari qua ina piztgada, là ina sticlada, mintgatant fa'la sbuvar in pèr cudeschs giu da curuna en stiva. Ma quai è dalunga emblidà. Dapi in brav temp ha ella la moda da luentar la glatschera sventulond cun il favugn per cuschina enturn. Ma era quai vegn a passar. Tschel di ha'la traffitgà cun insatge en il curtin dals vischins. Questa stad na crescha il pastget probabel betg



là. Ma nagin n'ha vesì. Po capitar. U fissas vus anc consternads dad in'inundaziun en bogn e cuschina, capitada avant prest in onn? Aba, gia emblidà! Eba: in lavachau, e lura èsi schon bun. Quai è gea normal, uffants halt, quai hai adina dà. ... e gia èsi in auter che fa canera!

Per il mument è la sora Guerra en ina fasa difficila. I ha cumenzà tut andetgamain, ed ussa grescha e furiescha ella pir che mai. Las psicologas ed ils medis èn perplexs ed ils geniturs sa deditgeschan cun tutta premura a quest uffant. Els audan frasas sco: Quai passa, insacura, insaco. I ha anc auters da quels cas en il quartier. Ma il confièrt è pitschen, perfin cinic, en vista a la sventira sociala, corporala e materiala che regna ussa qua en chasa. Perquai na ristga nagin da menziunar auters conflicts bunamain banals – era sch'ins vul tut auter che re-

lativar u perfin ridicular la crudaivladad dal mument.

Ils geniturs ston metter prioritads era tranter ils uffants. Sa chapescha ch'els han quità da tuts, ma in u l'auter sto en num da Dieu spetgar mintgatant, igl è la finala da differenziar tranter cridar e tugnar. I va insaco be da sa concentrar sin ina catastrofa a la giada. Uschia siglia Pandemia ussa libramain per il quartier enturn. Betg pli cun tantas smanatschas, ma in mez egl èsi dad avair sin ella; forsa meglier cumprar in termagl, avant ch'ella fetschia ina proxima tuppada? Tge ch'ils fragliuns Accidents (Chemia, Petroli, Atom e Traffic) truschan, quai na san ins mai. I fiss d'als prender davent lur termagls privlus, ma lura vegni pli stentus per ils geniturs dad occupar ils uffants. Per Terratrembel ed Erupziun n'è questa famiglia betg responsabla, ma ins emprova d'als tegnair en mastrinas, cura ch'els èn sin visita. E la figlia Midada Climatica? Ella è modesta. «Pertge adina vus?», ha'la bain planschì tschel di davos maisa si per ses fragliuns. Ils geniturs l'han consolà ina giada dapli: «Spetga uss, pli tard lura!»

La dumonda è però: Sche uffants survegnan memia pouca atenziun, tge capita pli tard?

Silvana Derungs da Cuir è redactura dal DRG e mamma.